

# 1 Ka mua, ka muri

## Te titiro whakamuri kia taea ai te ahu whakamua

### Mahere wātū

#### Ngā karere matua

- I ōku tūpuna ō rātou anō aramahi e whaihua ana, e hira ana i te wā i a rātou.
- Kei roto i a au te pūmanawa hei whai i tētahi aramahi nā te mea he uri ahau nō ngā tāngata tautōhito i a rātou ngā kete o te wānanga.
- He utauta whaitake māku tētahi mahere aramahi mō āpōpō.

### Te raupapa wātū

1. Timata ki te karakia, ka tonu i ngā rangatahi kia whakamōhio atu ko wai rātou. Kī atu ki ngā rangatahi e honoa ana rātou ki ō rātou tūpuna nā rātou i whakatere te moana tuauriuri whakahara kia ū mai ai ki konei i tōna 1,000 tau o mua. Tirohia te Kupu Whakataki mō Ngā mahi a ngā tūpuna mō ētahi kōrero anō. Matapaki:
  - I whai aramahi ō tūpuna, ki ō whakaaro?
  - Me whai aha rātou kia ū mai ai ki Aotearoa?
  - Nā wai te waka i hanga? Nā wai te moana i whakatere? Nā wai te kai i taka?
  - Nō tētahi aramahi aua mahi?Whakaūngia te hira o ngā aramahi katoa i ngā porihanga o neherā. Mā taua matapaki e whakatakoto te kōrero mō te Hōtaka Aramahi Mā Te Rangatahi. Hoki atu ki ngā ariā matua, me te whakapakari tonu, puta noa i ngā wātū katoa.
2. Whakamōhio rātou ki te whakataukī i Kaiārahi PowerPoint 1. Tautuhia ngā kupu kua mōhio kētia e rātou. Mā te wānanga ā-rōpū iti, tonoa ngā rangatahi ki te tūhura i te tikanga o te whakataukī, me te tiritiri i ā rātou whakamāramatanga. Matapaki:
  - Mō te aha te waka? (Te haere, te tiki kai, te tauwhāinga.)
  - Mō te aha te hoe? (Ko tāna, he āwhina i a koe ki te neke whakamua, he ārahi i a koe me te kore e kotiti.)
  - Ka aha mēnā kāore i a koe tētahi hoe? (Ka kotiti koe, ka teretere noa, ka ngaro.)

#### Ngā āheinga aramahi matua

Whakaatu māramatanga ki te pānga o te mahi ki ngā hiahia me ngā mahi o te porihanga me te ōhanga.

Whakaaturia ngā āhuatanga me te māramatanga ki tō te tangata whakaaro takatika ā-hinengaro mōna anō.

Whakaatu māramatanga ki ngā mahi whakamahere aramahi paetata me te paetawhiti.

#### Ngā pātai matua

Kua whai aramahi ō tūpuna?

He aha tēnei mea te aramahi?

He aha ngā momo pūkenga i ō tūpuna?

#### Ngā rauemi tautoko

Kaiārahi PowerPoint 1

Kupu whakataki – Ngā mahi a ngā tūpuna

Ngohe rangatahi:  
Pūwhakamahere aramahi  
Te haerenga hou

#### Roanga

30 meneti

# 1 Ka mua, ka muri Te titiro whakamuri kia taea ai te ahu whakamua

## **Mahere wātū** (e haere tonu ana)

3. Whakamōhiohia, ka whakamārama i ngā wāhanga e whā o te pūwhakamahere aramahi – Te kaihoe, Te waka, Te hoe, Tangaroa. Kī atu ki ngā rangatahi mā rātou e mahi tētahi raupapa wātū e nui ake ai te tūhura i ngā wāhanga e whā, ka mutu, ka whakaoti i tā rātou anō mahere aramahi.
4. Pātaitia anō ngā rangatahi mēnā ki ō rātou whakaaro i whai aramahi ō rātou tūpuna. Āhukahukatia ngā hononga o ngā rangatahi ki ngā aramahi o ō rātou tūpuna mā te whakapapa. Kīia atu, hei uri a ō rātou anō tūpuna pūkanga-maha, he mutunga kore tō rātou pūmanawa hei whai i tētahi aramahi.
5. Tonoa ngā rangatahi kia whakaoti i te wāhanga tuatahi, Te kaihoe, o te pūwhakamahere aramahi Te haerenga hou.